

Los ntawm Thawj Tswj Hwm
Thomas S. Monson

Kev Ris Txiaj Yog qhov Khoom Plig uas Los Saum Ntuj Los

*Yuav muaj kev ris txiaj . . . thaum uas peb ua peb Leej Txiv
Saum Ntuj Ceeb Tsheej tsaug rau Nws tej koob hmoov thiab
ua cov neeg uas nyob ntawm peb ib ncig tsaug rau txhua
yam uas lawv ua rau peb hauv lub neej no.*

Tuas no mas zoo kawg nkaus. Thaum kuv raug tsa ua tus Thawj Tswj Hwm ntawm lub Koom Txoos, kuv hais tias, “Kuv yuav tseg ib txoj hauj lwm rau kuv tus kheej ua. Kuv yuav ua tus uas tawm tswv yim pab Tsev Kheej pawg Hu Nkauj.” Kuv zoo siab heev txog kuv pawg hu nkauj no! Muaj ib zaug kuv niam hais rau kuv hais tias, “Tommy, kuv zoo siab txog tag nrho txhua yam uas koj tau ua lawm. Tiam sis kuv xav hais ib qho rau koj. Kheev lam koj tau yeej meem xyaum ntaus nkauj.” Ces kuv mus zaum rau ntawm lub phias ab naum thiab ntaus ib zaj nkauj rau nws: “Cia peb mus, [cia peb mus] koom ib lub rooj kev lom zem rau hnuv yug.”¹ Ces kuv hnia nws ib pas rau ntawm nws lub hauv pliaj, thiab nws khawm kuv. Kuv xav txog kuv niam. Kuv xav

txog kuv txiv. Kuv xav txog tag nrho cov Tuam Thawj Coj uas tau pab qhuab qhia kuv, thiab lwm tus neeg, suav cov poj ntsuam uas kuv tau mus xyuas ntshawv ntshis—85 tug tag nrho—nqa ib tug qaib mus rau lawv ci, los yog nqa me ntsis nyiaj mus muab pub rau lawv siv. Nag hmo kuv mus xyuas ib tug poj ntsuam thiab. Twb yog ib tag hmo, thiab kuv mus tom lub tsev laus, thiab tus neeg txais tos qhua hais tias, “Tej zaum nws tsaug zog lawm tiag, tiam sis nws hais kom kuv tsa nws sawv, vim nws hais tias, ‘Kuv paub tias nws yuav tuaj xyuas kuv.’” Kuv tuav nws txhais tes; nws hu kuv lub npe. Nws twb tsis tsaug zog lawm. Nws muab kuv txhais tes twb rau nws ob daim di ncauj thiab hais tias, “Kuv paub tias koj yuav tuaj tiag.” Kuv yuav ua li cas tsis tuaj li?

Tej nkauj zoo kawg kuj tshoov kuv lub siab ib yam nkaus li ntawd.

Kuv cov kwv tij thiab cov muam, peb twb hnov tej zaj xov txog qhov tseeb, kev cia siab, thiab kev hlub. Peb twb tig peb tej kev xav mus rau Nws tus uas tau theej peb lub txhoj, tus uas tau ua yam ntxwv rau peb saib seb yuav ua neeg zoo li cas thiab yuav thov Vajtswv li cas, thiab tau qhia los ntawm tej yam Nws ua hais tias kev pab lwm tus neeg yog ib txoj koob hmoov—twb yog peb tus Cawm Seej thiab tus Tswv, Yexus Khetos.

Nyob hauv phau Lukas, tshooj 17, peb nyeem ntawv txog Nws hais tias: “Thaum Yexus mus nram lub nroog Yeluxalees, nws hla lub xeev Kalilais mus.

“Thaum nws tab tom yuav mus rau hauv ib lub zos, [nws ntsib] kaum tus mob ruas. Lawv sawv deb deb,

“Thiab hu nrov nrov hais tias, ‘Tswv Yexus! Thov koj hlub peb!’

“Thaum Yexus pom dheev lawv, nws hais rau lawv hais tias, Nej cia li mus cuag cov pov thawj kom lawv saib nej. Thaum cov neeg mob ruas ntawd tab tom mus, lawv tej ruas twb zoo lawm.

“Lawv cov ntawd muaj ib tug pom hais tias, nws tej ruas zoo tas lawm, nws txawm rov qab los thiab hais nrov nrov ua Vajtswv tsaug.

“Nws txhos caug ntua ntawm Yexus ko taw ua Yexus tsaug. Tus ntawd yog neeg Xamalis.

“Yexus hais tias, ‘Kaum leej twb zoo huv tib si lawm? cuaj leeg dua twg tas lawm?’

“Vim li cas tsuas muaj tib leeg uas yog lwm haiv neeg los ua Vajtswv tsaug xwb?”

“Thiab Yexus hais rau tus ntawd hais tias, Koj cia li sawv mus tsev; koj txoj kev ntseeg twb ua rau koj tej ruas zoo lawm.”²

Dhau los ntawm lub ntuj txoj kev pab, cov neeg mob ruas thiaj dim txoj kev tuag thiab tau txoj sia tshiab. Ib tug los ua tus Xib Hwb tsaug nws thiaj tau koob hmoov, es cuaj leej tsis muaj kev ris txiaj ua rau Nws poob siab.

Kuv cov kwv txij cov muam, peb puas nco qab ua Vajtswv tsaug rau tej koob hmoov uas peb txais? Txoj kev ris txiaj tiag tsis yog pab peb nco qab txog peb tej koob hmoov xwb, tiam sis qhov ntawd qhib lub ntuj ceeb tsheej thiab pab peb hnov Vajtswv txoj kev hlub.

Kuv tus phooj ywg uas kuv hlub Thawj Tswj Hwm Gordon B. Hinckley hais tias, “Thaum nej muaj kev ris txiaj, nej tsis muaj kev khav theeb thiab kev muab hlob thiab kev saib yus tus kheej siab heev; nej tsuas muaj tus ntsuj plig uas muaj kev ris txiaj uas ua rau nej ua neeg ntxim nyiam thiab yuav foom koob hmoov rau nej lub neej.”³

Nyob hauv Phau Vaj Lug Kub Npaiv Npaum hauv phau Mathais, peb nyeem ib zag dab neeg ntxiv txog kev ris txiaj, lub sij hawm no yog tus Cawm Seej txoj kev ua Vajtswv tsaug. Thaum Nws taug kev peb hnuv hauv roob moj sab qhua, muaj coob tshaj 4,000 neeg uas raws qab thiab nrog Nws taug kev. Nws hlub lawv heev, vim lawv tsis tau mov noj rau peb hnuv ntawd. Tiam sis Nws cov thwj tim nug hais tias, “Ntawm no yog roob moj sab qhua xwb, peb yuav mus nrhiav mov qhov twg los kom txaus cov neeg no noj?” Zoo li peb sawv daws feem coob, cov thwj tim tsuas pom qhov uas lawv tsis muaj lawm xwb.

“Yexus nug cov thwj tim hais tias, Nej muaj pes tsawg lub ncuav? [Cov thwj tim] teb hais tias, Peb muaj xya lub ncuav thiab ob peb tug ntsees me me xwb.

“Yexus hais kom sawv daws zaum hauv av.

“Ces nws txawm muab xya lub ncuav thiab cov ntsees ntawd los *ua Vajtswv tsaug*, thiab muab ntais cev

rau cov thwj tim; cov thwj tim koj mus faib rau sawv daws noj.”

Nco qab ntsoov pom hais tias tus Cawm Seej ua Vajtswv tsaug rau tej yam uas lawv muaj—thiab txawm muaj ib qho txuj ci loj: “Txhua tus puav leej tau noj tsau huv tib si. Cov thwj tim mus sau cov ncuav seem uas sawv daws noj tsis tas, tau xya tawb puv nkaus.”⁴

Peb sawv daws twb pom muaj tej lub sij hawm thaum peb tsuas xav txog tej yam uas peb tsis muaj, es tsis nco qab txog peb tej koob hmoov. Tus neeg Kilis Epictetus hais paj lug hais tias, “Tus neeg txawj ntse yog tus neeg uas tsis tu siab rau tej yam uas nws tsis muaj, tiam sis zoo siab rau tej yam uas nws muaj xwb.”⁵

Kev ris txiaj yog ib txoj ntsiab cai uas los saum ntuj los. Tus Tswv tshaj tawm, dhau ntawm kev tshwm sim rau tus Yaj Saub Yauxej Xamiv, hais tias:

“Nej yuav tsum ua tus Tswv nej tus Vajtswv tsaug txog txhua yam. . . .

“Thiab tsis muaj ib yam dab tsi uas tub qaug Vajtswv, los sis yuav ua rau Nws npau taws, npaum li cov uas tsis lees paub tias nws pab lawv ua txhua yam.”⁶

Nyob hauv Phau Ntawv Maumoos peb kawm hais tias peb yuav tsum “ua neej nyob hauv txoj kev ua tsaug txhua hnuv, vim tej kev hlub tshua thiab tej koob hmoov ntau uas Vajtswv tau muab rau nej.”⁷

Txawm peb ua neej nyob li cas los xij, peb txhua tus muaj ntau yam uas peb yuav tsum muaj kev ris txiaj yog tias peb yuav nres ib pliaj thiab xav txog peb tej koob hmoov.

Nov yog ib lub caij zoo heev los nyob hauv ntiaj teb no. Txawm tias niaj hnuv no muaj ntau yam phem hauv ntiaj teb no los, tseem muaj ntau yam ncaj thiab zoo thiab. Muaj tej kev sib yuav uas kav ntev mus, niam thiab txiv uas hlub lawv cov me nyuam thiab txi ntau yam rau lawv, cov phooj cov ywg uas hlub peb thiab pab peb, cov nais khu uas qhia peb. Peb lub neej muaj ntau yam koob hmoov uas suav tsis txheeb.

Peb txhawb nqa tau peb tus kheej, thiab lwm tus neeg, thaum peb tsis

kam pheej xav txog tej yam phem thiab kho peb tej siab tej ntsws kom ris Vajtswv txiaj tas mus li. Yog tias txoj kev tsis muaj kev ris txiaj yog ib txoj kev txhaum loj heev, ces kev ris txiaj thiaj yog ib qho kev tsim txiaj zoo tshaj plaws thiab. Muaj ib tug neeg uas hais tias, “kev ris txiaj tsis yog ib qho tseem ceeb tshaj ntawm tej kev tsim txiaj xwb, tiam sis yog lub hauv paus rau txhua yam kev tsim txiaj tiag.”⁸

Peb yuav ua li cas thiaj koj kom haj yam muaj kev ris txiaj hauv peb lub siab? Thawj Tswj Hwm Joseph F. Smith, tus Thawj Tswj Hwm thib rau ntawm lub Koom Txoos, tau teb lo lus nug ntawd. Nws hais tias, “Tus neeg ris txiaj pom ntau yam hauv ntiaj teb no uas nws xav ua Vajtswv tsaug rau, thiab nws pom muaj tej yam zoo ntau tshaj tej yam phem. Kev hlub kov yeej kev khib siab, thiab qhov kaj tshem kev tsaus ntuj tawm ntawm lub neej no mus.” Nws hais txuas ntxiv mus hais tias, “Kev khav txiv ua rau peb txoj kev ris txiaj puas tsuaj mus thiab tsuas ua rau peb ua neeg qias dub. Peb haj yam muaj kev zoo siab thaum peb nyob ze ib tug neeg uas muaj kev ris txiaj thiab hlub yus, thiab peb yuav tsum ua tib zoo thov Vajtswv hauv peb lub neej xwv kom peb thiaj yuav ua tau Vajtswv thiab tib neeg tsaug!”⁹

Thawj Tswj Hwm Smith tab tom qhia peb tias kev thov Vajtswv tsis tu tsis tseg yog tus yuam sij uas ua rau peb muaj kev ris txiaj.

Tej yam khoom ntiaj teb puas ua rau peb zoo siab thiab muaj kev ris txiaj? Tej zaum rau ib nyuag ntu xwb. Tiam sis, tej yam uas ua rau peb muaj kev zoo siab thiab kev ris txiaj uas kav ntev mus yog tej yam uas nyiaj txiaj yuav tsis tau: xws li peb tsev neeg, txoj moo zoo, cov phooj ywg zoo, peb txoj kev noj qab nyob zoo, peb tej kev txawj, txoj kev hlub uas lwm tus neeg muab rau peb. Ntxim tu siab kawg, vim feem ntau mas peb tsis nco qab ua Vajtswv tsaug rau tej yam no.

Tus kws sau ntawv uas tuaj As Kiv teb tuaj hu ua Aldous Huxley tau sau hais tias, “Yuav luag txhua tus neeg

muaj cuab kav tsis nco qab ua Vajtswv tsaug rau tej yam uas nws tau lawm.”¹⁰

Feem ntau peb tsis tshua nco qab txog cov neeg uas tiag tiag mas peb yuav tsum ris txiaj ntau tshaj plaws. Cia peb tsis txhob tos txog thaum lig lawm es peb mam li qhia lawv tias peb ris lawv txiaj. Hais txog cov neeg uas twb tso lub neej no tseg lawm, ib tug poj niam qhia nws txoj kev tu siab thaum nws hais tias: “Kuv nco qab tej lub caij muaj kev zoo siab thiab muaj ntau zaus uas kuv xav qhia kuv txoj kev ris txiaj rau cov neeg uas twb tuag lawm, tiag tiag lawv yuav tsum tau hnov tej lus ntawd thaum lawv tseem ua neej nyob.”¹¹

Txoj kev xiam ib tug neeg uas peb hlub yeej ua rau peb tu siab me ntsis. Peb yuav tsis tu siab ntau npaud yog tias peb niaj hnuv qhia lawv tias peb hlub lawv thiab ris lawv txiaj. Peb yeej tsis paub thaum twg thiaj yuav lig lawm.

Yog li ntawd, yuav muaj kev ris txiaj thaum uas peb ua peb Leej Txiv Saum Ntuj Ceeb Tsheej tsaug rau Nws tej koob hmoov thiab ua cov neeg uas nyob ntawm peb ib ncig tsaug rau txhua yam uas lawv ua rau peb hauv lub neej no. Yuav tsum rau siab ntso ua—mus txog rau thaum peb twb kawm tau thiab txawj muaj kev ris txiaj tiag. Feem ntau peb yeej ris lwm tus neeg txiaj thiab *xav* hais tias peb yuav ua tus ntawd tsaug, tiam sis tsis nco qab los sis pheej tsis hais xwb Muaj ib tug neeg uas hais tias “qhov uas ris lwm tus neeg txiaj es tsis hais qhia tawm rau tus neeg ntawd yeej zoo ib yam li qhov uas muab ib qho khoom plig qhwv cia es tsis muab pub rau leej twg li.”¹²

Thaum twg peb muaj kev cov nyom thiab teeb meem hauv peb lub neej, feem ntau mas nyuaj nyuaj rau peb xav txog peb tej koob hmoov. Tiam sis, yog peb sib zog thiab nrhiav kom tau, peb yeej yuav to taub thiab pom hais tias peb twb txais tau ntau yam lawm tiag.

Kuv xav qhia nej txog ib yim neeg uas nrhiav tau tej koob hmoov ntau, txawm tias lawv raug teeb meem ntau

heev. Nov yog ib zaj kuv tau nyeem ntau xyoo tas los lawm thiab tau muab khaws cia vim nws qhia ib zaj xov zoo. Tus kws sau yog Gordon Green thiab nws zaj no yog luam tawm hauv Teb Chaw Amelikas ib phau ntawv xov xwm li 50 xyoo tas los lawm.

Gordon piav tias nws loj hlob tuaj hauv ib thaj teb pem Canada teb, nws thiab nws cov kwv tij cov muam tau lawb ntawv thiab khiav tiaj loos los tsev thaum lwm cov me nyuam mus ua si thiab ua luam dej. Tiam sis, lawv txiv txawj pab lawv to taub tias tej hauj lwm uas lawv ua yuav pab tau lawv li cas. Qhov no haj yam tseem ceeb thaum txog lub caij mus sau qoob loo, thaum lawv tsev neeg ua koob tsheej nco txog hnuv Thanksgiving, vim hnuv ntawd lawv txiv tau muab ib qho khoom plig zoo kawg rau lawv. Nws ntsuam xyuas seb lawv muaj khoom npaum li cas.

Hnuv Thanksgiving yav sawv ntxov, nws coj lawv mus rau hauv chav khaws zaub mov cia es lawv pom tej thoob txiv av paum, qos liab, lauj pwm liab hauv cov av xuab zeb, pom tej pawg qos yaj ywm, thiab muaj cov taum mog, pob kws, taum lag, kua txiv hmab pleev khob cij, txiv pos nphuab thiab lwm yam khoom txawb rau saum cov tsee yam puv nkaus li. Nws kom cov me nyuam ua tib zoo suav txhua yam. Ces lawv txawm mus rau hauv lub nkuaj tsiaj txhu thiab xyuas seb lawv twb khaws tau cov zaub nyuj ntau npaum li cas thiab xyuas seb muaj tej hnuv nplej ntau npaum li cas hauv lub txhab nplej. Lawv tau suav cov nyuj, cov npua, cov qaib, cov qaib ntxhw, thiab cov os. Lawv txiv hais tias nws xav paub seb lawv nyob li cas, tiam sis nws xav kom lawv paub tias thaum ua rooj mov noj ntawd, Vajtswv twb foom koob hmoov rau lawv ntau npaum li cas lawm thiab nws pom zoo rau lawv tej hauj lwm lawm. Thaum kawg, thaum lawv zaum yuav noj puas mov uas lawv niam tau ua lawm, lawv thiaj paub zoo txog lawv tej koob hmoov.

Tiam sis, Gordon qhia tias hnuv

Thanksgiving uas nws muaj kev ris txiaj ntau tshaj plaws yog xyoo uas zoo nkaus li lawv tsis muaj dab tsi yuav ua Vajtswv tsaug txog.

Thaum lub xyoo pib ntawd zoo li txhua yam yeej yuav zoo: lawv tseem tshuav cov zaub nyuj, muaj noob nplej ntau ntau, plaub tug me nyuam npua; thiab lawv txiv twb tseg me ntsis nyiaj xwv kom lawv yuav tau lub tshuab hlais zaub nyuj—yog ib lub tshuab zoo heev uas lwm cov neeg ua liaj ua teb feem coob yuav ua npau suav txog xwb. Xyoo ntawd lawv lub zos tau pib txuas tej xov hluav taws xob thiab—tab sis mas lawv lub tsev tseem tsis tau muaj, vim lawv tsis muaj nyiaj txaus yuav hluav taws xob.

Muaj ib hmo Gordon niam tab tom ntxhua ris tsho, es Gordon txiv los pab ntxhua ris tsho thiab tau hais kom nws tus poj niam mus so thiab xaws paj ntaub me ntsis. Nws hais tias, “Koj siv sij hawm ntxhua ris tsho ntau dua koj siv tsaug zog. Es koj puas xav tias peb yuav tsum txuas hluav taws xob?” Txawm tias qhov ntawd ua rau tus niam zoo siab los, nws los kua muag vim nws paub hais tias yog tias nkawd ua li ntawd ces, nws tus txiv yuav yuav lub tshuab hlais zaub nyuj tsis tau.

Ces lawv thiaj tau txuas txoj xov hluav taws xob xyoo ntawd. Txawm tsis yog ib yam loj heev, lawv twb yuav tau ib lub tshuab ntxhua ris tsho uas ntxhua tau tej ris tsho tag ib hnuv thiab tej teeb uas dai ncuw ntawm lub qab nthab rau lawv sawv daws pom tau kev. Tsis tas txhab roj rau tej teeb roj, tsis tas yim cov teeb xeeb, thiab tsis tas txhuam qhov chaw tso pa hluav taws lawm. Lawv txawm muab cov teeb roj tso cia.

Qhov uas lawv thaj teb txuas tau hluav taws xob lawm yog yam zoo kawg uas muaj los rau lawv xyoo ntawd. Thaum lawv tej qoob loo tab tom ncau tawm hauv av los, lub ntuj pib los nag hlob heev. Thaum cov dej ntws mus tas lawm, tsis tshuav ib hom qoob loo qhov twg hlo li. Lawv rov qab cog qoob loo dua ib zaug, tiam sis tseem los nag hlob heev es

ua rau txhua yam puas tsuaj mus xwb. Lawv cov qos yaj ywm lwj tas hauv cov av nkos. Lawv muab lawv ob peb tug nyuj thiab txhua tus npua thiab lwm yam tsiaj txhu uas tiag tiag lawv xav khaws cia muag lawm, es muab muag pheed yig xwb vim sawv daws tau ua tib yam li ntawd thiab. Xyoo ntawd lawv tsuas sau tau ib co zaub uas ntug hauv paus uas tseem ciaj txawm los nag hlob heev.

Twb rov qab txog hnuv Thanksgiving dua. Lawv niam hais tias, “Tej zaum xyoo no cia li kav liam xwb. Peb twb tsis tshuav ib tug os hlo li.”

Tiam sis, Hnuv Thanksgiving yav sawv ntxov, Gordon txiv twb mus tua tau ib tug luav thiab hais kom Gordon niam ua mov rau lawv noj. Gordon niam txawm pib ci nqaij, es hais tias yuav siv sij hawm ntev heev ci cov nqaij luav tawv ntawd. Thaum lawv pib noj cov nqaij luav ntawd ntx-uag ib co zaub uas ntug hauv paus, cov me nyuam twb tsis kam noj. Gordon niam txawm quaj quaj, ces nws txiv txawm ua ib yam txawv txawv. Nws txawm mus saum nthab thiab muab ib lub teeb roj, es muab tso rau ntawm lub rooj noj mov thiab tau taws teeb. Nws hais kom cov me nyuam mus tua cov teeb hluav taws xob. Thaum tsuas muaj lub teeb roj xwb, lawv xav tsis thoob vim chav tsev ntawd tsaus ntuj heev. Lawv tsis paub hais tias lawv tau ua li cas thiaj pom tau kev ua ntej muaj teeb hluav taws xob.

Lawv foom koob hmoov rau cov khoom noj, thiab sawv daws tau noj. Thaum noj hmo tas, sawv daws zaum ntsiag tos. Gordon sau hais tias:

“Thaum ua siab mos siab muag zaum ntawm lub teeb roj uas tsaus tsaus ntawd peb thiaj tau pom kev khav dua ib zaug ntxiv. . . .

“Yog ib pluag mov qab heev. Tus luav yeej qab li qaib ntxhw, thiab cov zaub uas ntug hauv paus yeej qab tshaj txhua yam uas peb tau noj dua. . . .

“ . . . [Peb] lub tsev . . . , txawm tsis zoo tag nrho, yeej muaj txhua yam uas peb xav tau.”¹³

Kuv cov kwv tij thiab cov muam, txoj kev ris lwm tus txiaj yog ib yam zoo thiab ntxim qhuas; txoj kev ris lwm tus txiaj yog kev ua siab loj thiab dav; tiam sis yog yus ua neej nyob muaj kev ris txiaj hauv peb lub siab tas li yuav ua rau peb txais tau lub ntuj ceeb tsheej.

Tag kis no thaum kuv xaas kuv cov lus, kuv thov Vajtswv kom txawm peb ris Vajtswv txiaj ntau npaum li cas rau txhua yam uas peb muaj, thov kom peb yuav qhia peb tus Tswv thiab tus Cawm Seej, Yexus Khetos, saib peb ris nws txiaj npaum li cas. Nws txoj moo zoo teb tej lo lus nug tseem ceeb tshaj plaws hauv lub neej no hais tias: Peb tuaj qhov twg tuaj? Vim li cas peb thiaj los nyob hauv no? Peb cov ntsuj plig mus qhov twg thaum peb tuag lawm? Txoj moo zoo coj qhov kaj uas yog qhov tseeb los rau rau cov neeg uas nyob hauv kev tsaus ntuj nti.

Nws qhia peb tias peb yuav tsum thov Vajtswv li cas. Nws qhia peb tias peb yuav tsum ua neeg zoo li cas. Nws qhia peb tias peb yuav tsum tso lub neej no tseg li cas. Nws lub neej qhia txog txoj kev hlub tag nrho. Nws tau kho cov neeg uas muaj mob; Nws txhawb nqa cov uas poob siab; Nws cawm tau tus neeg uas ua txhaum dim.

Thaum kawg, Nws nyob Nws ib leeg xwb. Ib txhia Thwj Tim ua xyem xyav; ib tug tau ntxeev siab rau Nws. Cov tub rog Loos tau siv hmuov nkaug nws sab tav. Cov neeg siab phem tau tua Nws pov tseg. Tiam sis tseem hnov Nws cov lus zoo los ntawm lub Rooj Khauj Khaum Taub Hau uas hais tias, “Txiv, thov koj zam txim rau lawv! Rau qhov lawv tsis paub hais tias lawv ua dab tsi.”¹⁴

Tus neeg uas “muaj kev nyuaj siab, . . . thiab paub txog kev tu siab” yog leej twg¹⁵ Tus “Vaj Ntxwv ntawm

yeeb koob,”¹⁶ no, tus Tswv uas loj dua lwm tus tswv no yog leej twg? Nws yog peb tus Xib Hwb. Nws yog peb tus Cawm Seej. Nws yog Vajtswv Leej Tub. Nws yog tus uas muab kev cawm dim rau peb. Nws hu hais tias, “Cia li nrog kuv mus.”¹⁷ Nws txib hais tias, “Cia li mus ua ib yam li ntawd.”¹⁸ Nws taj thov peb hais tias, “Ua raws li kuv cov lus txib.”¹⁹

Cia peb raws Nws qab. Cia peb yoog Nws tus yam ntxwv. Cia peb mloog Nws lus. Thaum ua li no, peb thiaj muab tau qhov khoom plig pub rau Nws uas yog ris Nws txiaj.

Kuv ua ib siab thov Vajtswv kom peb yuav ua neej nyob xwv kom sawv daws yuav pom hais tias peb ris Vajtswv txiaj ntau npaum li cas. Thov kom kev ris txiaj yuav tog mus hauv peb lub nruab siab, tam sim no thiab tas mus ib txhis. Los ntawm Yexus Khetos lub npe dawb ceev, amees.

LUS CIM

1. John Thompson, “Birthday Party,” *Teaching Little Fingers to Play* (1936), 8.
2. Lukas 17:11–19.
3. *Teachings of Gordon B. Hinckley* (1997), 250.
4. Saib Mathais 15:32–38; ntxiv qhov uas ntawv qaij.
5. *The Discourses of Epictetus; with the Encheiridion and Fragments*, tus kws txhais lus George Long (1888), 429.
6. Lus Qhuab Qhia thiab Kev Khi Lus 59:7, 21.
7. Amas 34:38.
8. Cicero, hauv *A New Dictionary of Quotations on Historical Principles*, tus xaiv yog H. L. Mencken (1942), 491.
9. Joseph F. Smith, *Gospel Doctrine*, 5th ed. (1939), 263.
10. Aldous Huxley, *Themes and Variations* (1954), 66.
11. William H. Davies, *The Autobiography of a Super-Tramp* (1908), 4.
12. William Arthur Ward, hauv Allen Klein, tus sau ua ke ua ib phau, *Change Your Life!* (2010), 15.
13. Kho los siv los ntawm H. Gordon Green, “The Thanksgiving I Don’t Forget,” *Reader’s Digest*, Kaum Ib Hlis Ntuj 1956, 69–71.
14. Lukas 23:34.
15. Yaxayas 53:3.
16. Phau Ntawv Nkauj 24:8.
17. Mathais 4:19.
18. Lukas 10:37.
19. Yauhas 14:15.

Kev Qhia rau Peb lub Caij Nyoog

Tej zaj lus qhia hauv pawg Pov Thawj Hwj Mekixedes thiab lub Koom Haum Niam Tsev tej kev sib ntsib thaum hnuv Sunday thib plaub yuav yog tsom ntsoov tej “Kev Qhia rau Peb lub Caij Nyoog.” Txhua zaj lus qhia yus npaj tau los ntawm ib zaj los yog ob peb zaj lus hais los ntawm lub tuam rooj sab laj uas muaj tsis ntev tas los no. Ceg txheem ntseeg thiab koog chaw cov thawj tswj hwm xaiv tau tej zaj lus hais uas tsim nyog siv, los yog lawv muab lub luag hauj lwm no so rau cov npis sov los yog ceg ntseeg cov thawj tswj hwm xaiv los tau thiab. Cov thawj coj yuav tsum hais lus txhawb nqa qhov uas cov kwv tij hauv pawg Pov Thawj Hwj Mekixedes thiab cov viv ncaus hauv lub Koom Haum Niam Tsev kawm tib cov lus hais thaum tib hnuv Sunday.

Tsim nyog cov mej zeej uas koom tej kev qhia no thaum hnuv Sunday thib plaub kawm thiab nqa tuaj rau hoob kawm ntawv vaj lug kub tsab ntawv xov xwm uas muaj cov lus hais tom lub tuam rooj sab laj zaum tas los nyob haud.

Tej Tswv Yim rau Kev Npaj ib zaj Lus Qhia los ntawm cov Lus Hais

Thov Vajtsv kom tau tus Vaj Ntsuj Plig Dawb Huv nrog koj nyob thaum koj kawm thiab qhia txog cov lus hais. Tej zaum koj yuav xav npaj zaj lus qhia siv lwm yam ntaub

ntawv xov xwm, tiam sis cov lus uas tau hais tom lub tuam rooj sab laj yog cov lus kawm uas lub koom txoos twb pom zoo rau lawm. Koj lub luag hauj lwm no yog kom pab lwm tus neeg kawm thiab ua neej raws li txoj moo zoo raws li tau qhia tawm hauv lub Koom Txoos lub tuam rooj sab laj uas tau muaj tsis ntev tas los no.


Ke tshab xyuas cov lus hais ke nrhiav kom tau tej ntsiab cai thiab tej lus qhuab qhia uas yuav pab cov kawm zoo tshaj. Tsis tas li ntawd, ua tib zoo nrhiav kom tau tej dab neeg, tej nqes vaj lug kub, thiab tej lus los ntawm cov lus hais uas yuav pab koj qhia tej qhov tseeb no.

Npaj ib tug txheej txheem qhia kev saib yuav ua li cas qhia tej ntsiab cai thiab tej lus qhuab qhia. Koj tus txheej txheem qhia kev no yuav tau muaj ib co lus nug uas yuav pab cov kawm:

- Nrhiav kom tau tej ntsiab cai thiab tej lus qhuab qhia.
- Xav saib tej ntawd lub ntsiab txhais li cas tiag.
- Qhia tawm tej yam uas koj to taub, tej tswv yim, tej yam uas muaj los rau koj, thiab koj tej lus tim khawv txog tej no.
- Qhia saib yuav ua li cas coj tej ntsiab cai thiab tej lus qhuab qhia no los mus siv hauv lawv lub neej.

Hli	COV NTAUB NTAWV QHIA THAUM HNUB SUNDAY THIB PLAUB
Kaum Ib Hlis Ntuj 2010– Plaub Hlis Ntuj 2011	Cov lus hais uas luam tawm hauv phau ntawv xov xwm <i>Liahona</i> thaum lub Kaum Ib Hlis Ntuj 2010*
Tsib Hlis Ntuj 2011– Kaum Hli Ntuj 2011	Cov lus hais uas luam tawm hauv phau ntawv xov xwm <i>Liahona</i> thaum lub Tsib Hlis Ntuj 2011*

*Cov lus hais no muaj txawm peem (ua ntau yam lus) nyob rau ntawm conference.lds.org.



Los ntawm Thawj Tswj Hwm Dieter F. Uchtdorf
Tus Pab Cuam thib Ob hauv Thawj Pawg Thawj Tswj Hwm

Hais Txog tej Yam uas Muaj Nqi Tshaj Plaws

Yog tias nej muaj lub neej maj heev thiab ntxhov siab heev uas ua nyuaj rau nej xav tias nej muaj kev zoo siab, ces tej zaum tam sim no yog ib lub sij hawm zoo rov qab tsum

Yog ib qho zoo heev uas peb muaj peev xwm kawm txog lub neej thaum peb kawm txog lub ntiav teb no. Piv txwv hais tias, cov kws tshawb fawb saib tej voj voog hauv cov ntoo thiab twv seb tej huab cua thiab tej av zoo li cas ntau pua thiab ntau txhiab xyoo yav tas los. Ib qho uas peb kawm los ntawm kev tshawb xyuas cov ntoo txoj kev loj hlob yog qhov uas thaum muaj tej lub caij zoo rau txoj kev loj hlob, cov ntoo loj tuaj zoo li qub. Tiam sis, thaum muaj tej lub caij tsis zoo rau txoj kev loj hlob, cov ntoo maj mam loj tuaj thiab siv zog ua tej yam tseem ceeb uas yuav tsum ua kom nyob taus xwb.

Tej zaum tam sim no nej ib txhia xav hais tias, “Ua li ntawd mas zoo thiab, tiam sis qhov ntawd piv li cas rau kev tsav nyob hoom?” Ces, cia kuv qhia nej ‘os.

Nej puas tau caij ib lub nyob hoom thaum nws deeg deeg? Qhov uas ua rau lub nyob hoom deeg deeg yog thaum cov cua uas nqa lub nyob hoom hloov sai sai es ua ua rau lub

taub hau nyob hoom cia li tsa hlo los yog nyo mus haud me ntsis, thiab ua rau lub nyob hoom lem mus tom no los yog lem mus tom ub, los yog dov mus dov los. Txawm lawv ua kom cov nyob hoom muaj zog tiv taus kev deeg deeg no co tshaj txhua yam yuav deeg tau thaum tsav nyob hoom raws li qhov thas mas das, tej zaum tseem yuav ua rau cov uas caij nyob hoom txhawj heev.

Nej xav tias cov kws tsav nyob hoom ua li cas thaum lub nyob hoom deeg deeg li hais no? Ib tug tub kawm tsav nyob hoom yuav xav tias yog ib lub tswv yim zoo mus ceev vim hais tias yuav ua rau nws mus dhau ntawm qhov uas ua rau lub nyob hoom deeg deeg sai dua. Tiam sis tej zaum ua li ntawd tsis yog ib qho zoo ua. Cov kws tsav nyob hoom to taub hais tias yuav tsum tsav mus ceev npaum li cas thaum deeg deeg li no kom thiaj li pab kom qhov deeg deeg no tsis ua li cas. Thiab feem ntau yuav tsum mus qeeb me ntsis. Tib lub ntsiab cai no kuj coj los siv

tau thaum hais txog tej speed bump rau ntawm kev.

Yog li ntawd, yog lb lub tswv yim zoo uas yus mus maj mam me ntsis, cia li ua raws li yus ua tau, thiab tsum ntsoov rau tej yam tseem ceeb xwb thaum raug tej yam uas ua rau yus lub neej kub ntxhov.

Qhov Ceev ntawm lub Neej Niaj Hnub Nim No

Nov yog ib zaj lus yooj yim kawm, thiab kuj yog ib qho tseem ceeb kawm. Tej zaum yus xav tias yog ib qho tseeb thaum hais txog cov ntoo los yog qhov kev deeg deeg, tiam sis yooj yim rau peb tsis quav ntsej zaj lus no thaum peb xav txog kev nruab tej ntsiab cai no rau hauv peb lub neej txhua hnub. Thaum peb muaj kev nyuaj siab ntxiv, thaum kev ntxhov siab tshwm los, thaum raug kev txom nyem, feem ntau peb pheej sim mus ceev zoo ib yam li qub los yog peb mus ceev dua, vim peb ho xav tias yog peb yim mus ceev ces yim yuav zoo.

Ib qho uas muaj hauv lub neej ntawm lub caij nyoog no yog qhov uas peb haj yam mus ceev heev, txawm yog peb raug teeb meem los raug kev cov nyom los yog.

Cia peb hais qhov tseeb tiag hais tias, yeej yog ib qho yooj yim rau peb nrhiav ntau yam ua. Peb txhua tus txawj xav txog ntau yam hauj lwm uas yuav ua rau peb tsis paub teem sij hawm rau tag nrho tej ntawd. Ib txhia neeg twb yuav xav hais tias qhov uas lawv saib lawv tus kheej rau nqi nyob ntawm seb lawv muaj hauj lwm ntau npaum li cas. Thaum twg lawv khoom ces lawv ua kom lawv lub sij hawm puv nkaus muaj tej kev sib ntsib thiab tej yam me me tsis tshua

tseem ceeb—tsis hais thaum lawv nyuaj siab los yog nkees los yog. Vim lawv ua kom lawv lub neej nyuaj heev, lawv pheed muaj kev nyuaj siab ntxiv, tsis muaj kev xyiv fab ntau, thiab tsis nco qab txog lub ntsiab ntawm lawv lub neej.

Tib neeg hais tias txhua yam zoo, thaum ua heev dhau, ces qhov zoo ntawd hloov los ua ib qho tsis zoo. Qhov uas peb teem sij hawm ntau dhau lawm los yeej zoo li no thiab. Muaj ib lub sij hawm uas peb tej hom phiaj thiab tej kev xav tau yuav hloov los ua tej kev lav ris hnyav heev.

Kev Kho tej Teeb Meem No Yog Dab Tsi?

Cov uas muaj tswv yim to taub thiab siv tej yam uas lawv tau kawm los ntawm cov ntoo tej voj voog thiab cov cua uas ua rau lub nyob hoom deeg. Lawv tiv tau tej kev ntxias uas hais kom lawv muaj teeb meem ntawm txoj kev khiav mus ub mus no hauv lub neej txhua hnuv. Lawv ua raws li cov lus qhia no hais tias, “Muaj ntau yam hauv lub neej no uas zoo dua qhov kev mus ceev zog.”¹ Hais tiag tiag, lawv tsom ntsoov rau tej yam uas tseem ceeb tshaj plaws.

Txwj Laug Dallin H. Oaks, nyob hauv ib lub tuam rooj sab laj qhia hais tias, “Peb yuav tsum tso tej yam zoo tseg xwv kom xaiv tau lwm yam uas zoo dua los yog zoo tshaj plaws, vim tej ntawd ua rau peb muaj kev ntseeg ntawm tus Tswv Yexus Khetos thiab ua rau peb tsev neeg muaj zog.”²

Kev nrhiav tej yam zoo tshaj plaws yeej coj yus mus rau tej ntsiab cai tseem ceeb ntawm Yexus Khetos txoj moo zoo—tej yam tseeb uas yooj yim thiab zoo nkauj uas ib Leej Txiv Saum Ntuj Ceeb Tsheej uas muaj siab zoo, nyob mus ib txhis, thiab paub tag nrho tau tshwm sim rau peb paub txog. Txawm yog tej lus qhuab qhia thiab tej ntsiab cai no yeej yooj yim rau ib tug me nyuam to taub, tej no teb tau tej lus nug nyuaj tshaj plaws hauv lub neej no.

Muaj ib qho zoo nkauj thiab ib qho paub tseeb los ntawm kev coj raws li qhov yooj yim uas tej lub sij hawm peb tsis nco tej txiaj ntsim no thaum

peb ntshaw kev kho teeb meem.

Piv txwv hais tias, tsis ntev tom qab cov kws mus nruab ntug tau caij lub nkoj huab mus ncig lub ntiaj teb, lawv txawm kawm tau hais tias cov xaum npiv los lawv siv tsis tau nyob saud. Yog li ntawd ib co neeg txawj ntse heev ua hauv lwm kho qhov teeb meem no. Lawv siv sij hawm ntev tsis ntev thiab siv ntau lab nyiaj, tiam sis thaum kawg, lawv tsim ib tug xaum npiv uas sau tau txawm yog lawv nyob qhov twg, sov thiab txias npaum li cas, thiab sau tau rau txhua yam. Tiam sis cov kws mus nruab ntug tau siv dab tsi ua ntej lawv kho tau qhov teeb meem no? Lawv cia li siv ib tug xaum qhuav nkaus xwb.

Tib neeg xav tias Leonardo da Vinci tau hais tias, “Kev yooj yim yog qhov txawj ntse tshaj plaws.”³ Thaum peb saib cov ntsiab cai ntawm Txoj Hau Kev Zoo Siab, Txoj Kev Cawm Seej, peb pom tau thiab nco tej txiaj ntsim txog qhov meej, kev yooj yim, qhov zoo nkauj ntawm Leej Txiv Saum Ntuj Ceeb Tsheej lub tswv yim. Ua peb txoj kev coj pauv los ua Nws txoj kev coj yog qhov pib rau peb tej tswv yim.

Lub Hwj Chim ntawm tej Yam Tseem Ceeb

Tib neeg hais dab neeg txog tus coach football uas muaj npe hu ua Vince Lombardi uas muaj ib qho uas nws ua thawj thawj hnuv uas nws cob qhia cov uas yuav ntaus football. Nws mam li tuav ib lub pob football siab, es muab rau cov nav kis las uas tau ntaus football ntau xyoo los lawm saib, thiab hais tias, “Cov txiv neej es, . . . *nov* yogib lub pob football!” Nws hais txog qhov uas lub pob loj li cas thiab zoo li cas, thiab saib yus yuav tsum ncaws, nqa, los yog cuam li cas. Nws coj pawg nav kis las ntawd mus txog lub tshav pob thiab hais tias, “Nov yog ib lub tshav pob football.” Nws coj lawv mus ncig tshav, piav saib lub tshav football loj li cas, zoo li cas, piav txog tej kev cai football, thiab saib yuav tsum ntaus football li cas.⁴

Tus coach no paub tias txawm yog lawv yog ib cov nav kis las uas txawj ntaus football los, lawv txhua tus thiab

pawg football ntawd yeej yuav haj yam los ua zoo dua tsuas yog thaum lawv muaj peev xwm ua tej yam uas tseem ceeb xwb. Lawv yeej siv sij hawm xyaum ua tej yam uas nyuaj heev los tau, tiam sis mus txog thaum lawv txawj ua tej yam ua lub hauv paus tseem ceeb ntawm txoj kev ntaus football, ces lawv yeej yuav tsis ua ib pawg uas txawj yeej kev sib tw.

Kuv xav hais tias peb feem coob yeej to taub hais tias tej yam no tseem ceeb npaum li cas. Tiam sis tej lub sij hawm muaj ntau ntau yam ntxias peb es ua rau peb tsis nco qab.

Cov ntaub ntawv, ntau hom xov xwm thiab yeeb yaj kiab, tej yam khoom uas siv hluav taws xob—tag nrho tej no yeej pab tau yog siv raws li kev tsim nyog—tiam sis kuj yuav ua rau peb tsis nco qab los yog nyob ib leeg xwb los tau thiab.

Tiam sis nyob hauv tag nrho cov suab thiab tej yam peb xaiv tau, tus Txiv Neej ntawm Kalilais txo hwj chim sawv thiab cev tes. Nws hais ib zaj lus yooj yim: “Los, nrog kuv mus.”⁵ Thiab nws tsis siv lub tshuab kom lub suab nrov, tiam sis nws ua lub suab yau yau hais lus.⁶ Yeej yooj yim rau txoj moo zoo tej zaj lus tseem ceeb ploj mus thaum muaj ntau yam xov xwm uas nyob ib puag ncig peb.

Cov vaj lug kub dawb huv thiab cov yaj saub uas tseem muaj txoj sia nyob cov lus qhia tias cov ntsiab cai thiab lus qhuab qhia ntawm txoj moo zoo tseem ceeb npaum li cas. Peb rov qab hais txog tej ntsiab cai tseem ceeb, thiab tej lus qhuab qhia dawb huv no vim tej no yog lub qhov rooj uas qhib kev rau qhov tseeb uas muaj lub ntsiab loj heev. Tej no yog lub qhov rooj uas qhib kev rau tej yam tseem ceeb kawg nkaus; yog tsis muaj tej ntawd ces yeej yuav ua rau peb tsis muaj peev xwm to taub. Tej ntsiab cai yooj yim thiab tseem ceeb yog cov yuam sij uas qhib kev rau tib neeg kom nrog Vajtswv sib raug zoo. Tej no yog cov yuam sij uas qhib lub rooj ntug. Tej no coj peb rau kev thaj yeeb, kev xyiv fab, thiab kev muaj tswv yim uas Leej Txiv Saum Ntuj Ceeb Tsheej

tau cog lus tias Nws cov me nyuam uas mloog Nws lus yuav muaj.

Cov kwv tij thiab cov muam, tsim nyog tias peb maj mam me ntsis ntxiv, khiav ceev npaum li qhov tsim nyog rau peb tej xwm txheej, tsoom ntsoov rau tej yam tseem ceeb, qhib qhov muag kom pom meej tej yam uas tseem ceeb tshaj plaws. Cia kom peb xav txog tej lub ntsiab cai uas peb Leej Txiv Saum Ntuj Ceeb Tsheej tau muab rau Nws cov me nyuam kom yuav txhim tsa lub neej hauv lub ntiaj teb no uas muaj ntau npluas mias nrog tej kev cog lus hais tias yuav muaj txoj kev zoo siab tas mus ib txhis li. Tej no yuav qhia peb ua “tag nrho txhua txhia yam no . . . los ntawm txoj kev txawj ntse thiab kev muaj txheej txheem; vim tsis tsim nyog tias peb yuav khiav nrawm dua li qhov peb muaj lub zog. [Tiam sis] tsim nyog tias [peb] yuav rau siab, xwv kom los ntawm qhov ntawd, [peb] yuav yeej qhov nqi zog.”⁷

Cov kwv tij thiab cov muam, kev rau siab ua tej yam uas tseem ceeb tshaj plaws yuav coj peb mus rau tus Cawm Seej ntawm lub ntiaj teb. Yog vim li ntawd “peb thiaj hais txog Khetos, peb zoo siab rau Khetos, peb qhia txog Khetos, peb qhia tej uas yuav muaj los yav tom ntej txog Khetos, . . . kom [peb] yuav paub txog yam uas yuav nrhiav los ntxuav [peb] tej kev txhaum mus.”⁸ Hauv kev nyuaj, kev kub ntxhov, thiab kev maj ntawm lub neej niaj hnuv nim no, nov yog “txoj kev zoo kawg nkaws.”⁹

Ces, tej Yam Tseem Ceeb Yog Dab Tsi?

Thaum peb hloov siab rau peb Leej Txiv Saum Ntuj Ceeb Tsheej thiab nrhiav kom tau nws lub laj lim tswv yim txog tej yam uas tseem ceeb tshaj plaws, peb yeej yuav rov qab kawm ntau zaus hais tias muaj plaub txoj kev sib raug zoo tseem ceeb: sib raug zoo nrog peb tus Vajtswv, nrog peb tsev neeg, nrog lwm tus tib neeg, thiab nrog peb tus kheej. Thaum peb kam ntsuam xyuas peb lub neej, peb yuav pom tej yam uas qhia tias peb tau txav mus ntawm txoj kev zoo

tshaj plaws. Yuav muab peb tej qhov muag ntawm peb txoj kev to taub qhib, thiab peb yuav paub tias yuav tsum ua li cas kom ua rau peb lub siab dawb huv thiab rov qab ua tej yam tseem ceeb.

Qhov thib ib, peb txoj kev sib raug zoo nrog Vajtswv yog qhov dawb ceev thiab tseem ceeb tshaj plaws. Peb yog Nws cov me nyuam ntsuj plig. Nws yog peb Leej Txiv. Nws xav kom peb muaj kev zoo siab. Thaum peb nrhiav kom tau Nws, thaum peb kawm txog Nws Leej Tub, Yexus Khetos, thaum peb qhib peb lub siab rau tus Vaj Ntsuj Plig Dawb Huv lub hwj chim, ces ua rau peb lub neej ruaj khov thiab muaj kev nyab xeeb ntxiv. Peb muaj kev thaj yeeb, kev xyiv fab, thiab peb txaus siab ntxiv thaum peb mob siab ua neej raws li Vajtswv txoj hauv kev nyob mus ib txhis thiab ua raws li Nws cov lus txib.

Peb haj yam nrog peb Leej Txiv Saum Ntuj Ceeb Tsheej sib raug zoo thaum peb kawm txog Nws; thaum peb nrog Nws sib txuas lus, hloov siab lees txim, thiab coj raws nraim li Yexus Khetos; vim “tsis muaj leej twg mus cuag tau Leej Txiv, tsuas yog mus ntawm [Khetos] xwb thiaj tau.”¹⁰ Xwv kom qhov uas peb nrog Vajtswv sib raug zoo muaj zog, peb thiaj yuav tsum siv sij hawm nrog Nws ib leeg xwb. Tej yam xws li kev thov Vajtswv yus tus kheej thiab kev kawm vaj lug kub txhua hnuv, thiab kev ua neeg tsim nyog muaj ib daim ntawv tso cai nkag tuam tsev—tej no yog tej kev siv sij hawm thiab lub dag zog uas zoo kom peb yuav los ze dua rau ntawm peb Leej Txiv Saum Ntuj Ceeb Tsheej. Cia peb ua raws li tus sau nkauj caw hais tias, “Nyob ntsiag to, thiab paub tias kuv yog Vajtswv.”¹¹

Qhov kev sib raug zoo tseem ceeb thib ob yog nrog peb tsev neeg sib raug zoo. Vim tias “tsis muaj dua ib qho kev tau raws li peb lub siab xav uas pauv tau qhov uas peb tsis tau raws li peb lub siab xav”¹² hauv no, ces peb yuav tsum saib peb tsev neeg rau nqi loj tshaj plaws. Peb nrog peb tsev neeg sib raug zoo thaum peb ua

tej yam yooj yim ua ke, xws li noj hmo ua ke, thiab ua tsev neeg hmo ua ke, thiab cia li muaj kev lom zem xwb. Hais txog tsev neeg txoj kev sib raug zoo mas *kev hlub* yeej yog sau hais tias *s-i-j h-a-w-m* tiag. Kom muaj kev siv raug zoo hauv tsev ib leeg yuav tsum siv sij hawm nrog ib leeg. Peb ib leeg nrog ib leeg sib tham, tsis yog peb ib leeg tham txog ib leeg xwb. Peb ib leeg kawm ntawm ib leeg, thiab peb ib leeg nco ib leeg txiaj ntsim txog qhov uas peb nyias txawv nyias tsis zoo ib yam thiab qhov uas peb zoo ib yam. Yuav ua rau peb sib hlub thaum peb ua ib tsev neeg koom siab nrog Vajtswv los ntawm kev thov Vajtswv, kev kawm vaj lug kub, thiab teev tiam thaum Hnuv Caiv.

Qhov kev sib raug zoo tseem ceeb thib peb yog nrog lwm tus neeg. Peb nrog lwm tus neeg sib raug zoo ib leeg dhau ib leeg zuj zus mus—thaum peb ua tib zoo saib lawv xav tau dab tsi, pab lawv, thiab siv sij hawm thiab peb tej txuj ci pab lawv. Qhov uas ib tug muam uas laus thiab mob heev tiam sis nws txiaj txim siab tias, txawm nws ua tsis taus ntau, nws txawj mloog lwm tus hais lus, tau tshoov kuv lub siab. Yog li ntawd, txhua lub lim piam nws nrhiav cov neeg uas zoo li nyuaj siab los yog poob siab thiab nws siv sij hawm nrog lawv, mloog lawv hais lus. Nws yeej foom koob hmoov rau coob tug neeg lub neej.

Qhov kev sib raug zoo tseem ceeb thib plaub yog nrog peb tus kheej. Tej zaum yog ib qho txawv xav hais tias peb yuav nrog peb tus kheej sib raug zoo, tiam sis yeej zoo li ntawd. Tej tug neeg nrog lawv tus kheej sib raug zoo tsis tau li. Lawv cem thiab thum lawv tus kheej tas ib hnuv mus txog thaum uas lawv pib ntxub lawv tus kheej. Cia kuv hais kom nej tsis txhob mus ceev npaum li ntawd thiab siv sij hawm ntxiv kom paub nej tus kheej zoo dua. Cia li taug kev mus nraum zoov, saib lub hnuv tuaj tim npoo ntuj, muaj kev zoo siab saib tej uas Vajtswv tau tsim, xav txog qhov tseeb ntawm txoj moo zoo uas tau muab txum tim rov qab los, thiab cia

li kawm hais tias tej ntawd muaj lub ntsiab dab tsi rau nej tus kheej. Cia li kawm kom saib nej tus kheej ib yam li Leej Txiv Saum Ntuj Ceeb Tsheej saib nej—nej yog Nws cov ntxhais los yog cov tub muaj nqi heev uas muaj peev xwm los saum ntuj los.

Cia Li Zoo Siab txog Txoj Moo Zoo uas Dawb Huv

Cov kwv tij thiab cov muam, cia kom peb muaj tswv yim. Cia kom peb rov qab nco txog cov lus qhuab qhia dawb huv ntawm Yexus Khetos txoj moo zoo uas tau muab txum tim rov qab los. Cia kom peb muaj kev xyiv fab vim tej no yeej yooj yim thiab meej. Lub ntuj twb rov qab qhib dua lawm. Yexus Khetos txoj moo zoo los yeej rov qab muaj nyob hauv lub ntiaj teb thiab tej qhov tseeb los ntawm txoj moo zoo ntawd yog lub hauv paus ntawm kev xyiv fab uas tsis tu ncu!

Cov kwv tij thiab cov muam,

muaj ntau yam uas ua rau peb zoo siab. Yog tias nej muaj lub neej maj heev thiab ntxhov siab heev uas ua nyuaj rau nej xav tias nej muaj kev zoo siab, ces tej zaum tam sim no yog ib lub sij hawm zoo rov qab tsom ntsoov rau tej yam uas tseem ceeb tshaj plaws.

Lub zog tsis yog los ntawm kev ua ub ua no, tiam sis los ntawm kev nyob khov kho saum ib lub hauv paus ruaj nrees ntawm qhov tseeb thiab qhov kaj. Lub zog los ntawm kev saib xyuas thiab rau siab ua tej yam tseem ceeb ntawm Yexus Khetos txoj moo zoo uas tau muab txum tim rov qab los. Lub zog los ntawm kev saib xyuas tej yam los saum ntuj los uas tseem ceeb tshaj plaws.

Cia peb ua kom peb lub neej yooj yim me ntsis. Cia kom peb yuav hloov tej yam uas yuav tsum hloov kom ua rau peb lub neej rov qab tsom ntsoov rau qhov zoo nkauj kawg ntawm txoj

kev yooj yim thiab txo hwj chim ua Yexus Khetos cov thwj tim—yog ib txoj kev uas yeej coj peb mus kom muaj lub neej uas muaj lub ntsiab, kev zoo siab thiab kev thaj yeeb. Kuv thov kom yuav muaj li no thaum kuv foom koob hmoov rau nej, los ntawm Yexus Khetos lub npe, amees.

LUS CIM

1. Mahatma Gandhi, hauv Larry Chang, *Wisdom for the Soul* (2006), 356.
2. Dallin H. Oaks, “Good, Better, Best,” *Liahona*, Kaum Ib Hlis Ntuj 2007, 107.
3. Leonardo da Vinci, hauv John Cook, tus sau ua ke, *The Book of Positive Quotations*, phau thib ob (1993), 262.
4. Vince Lombardi, hauv Donald T. Phillips, *Run to Win: Vince Lombardi on Coaching and Leadership* (2001), 92.
5. Lukas 18:22.
6. Saib 1 Vaj Ntxwv 19:12.
7. Mauxiyas 4:27.
8. 2 Nifais 25:26.
9. 1 Kaulithaus 12:31; Etaws 12:11.
10. Yauhas 14:6.
11. Phau Ntawv Nkauj 46:10.
12. J. E. McCulloch, *Home: The Savior of Civilization* (1924), 42; kuj saib Conference Report, Apr. 1935, 116 thiab.